



REPUBLIKA E SHQIPËRISË
KËSHILLI I QARKUT VLORË

Nr. 1615 Prot.

Vlorë, më 25.09.2023

VENDIM

Nr. 10, datë 19. 09.2023

**PËR MIRATIMIN E RREGULLORES
"PËR ORGANIZIMIN DHE FUNKSIONIMIN E KËSHILLIT TË QARKUT VLORË"**

Këshilli i Qarkut Vlorë i mbledhur më datën e sipërpërmendur në mbështetje të Nenit 77/a të Ligjit Nr.139/2015, datë 17.12.2015 "Për Vetëqeverisjen Vendore", i ndryshuar,

VENDOSI:

1. Të miratojë Rregulloren "Për organizimin dhe funksionimin e Këshillit të Qarkut Vlorë".
2. Ky vendim hyn në fuqi sipas parashikimit të nenit 78 të Ligjit Nr.139/2015, "Për Vetëqeverisjen Vendore", i ndryshuar.



Shpallur nga Prefekti i Qarkut Vlorë me shkrese nr 810/prot, dt 02 / 10 /2023



**REPUBLIKA E SHQIPËRISË
KËSHILLI I QARKUT VLORE**

RREGULLORE

**PËR ORGANIZIMIN DHE FUNKSIONIMIN E KËSHILLIT TË QARKUT
VLORE**

Kjo rregullore është hartuar në bazë të Kushtetutës së Republikës së Shqipërisë, neni 113, Ligjit Nr.139/2015, "Për Vetëqeverisjen Vendore", neni 77, Ligjit Nr.44/2015 "Kodi i Procedurave Administrative të Republikës së Shqipërisë".

KREU I

DISPOZITA TË PËRGJITHSHME

Neni 1

Objekti dhe Qëllimi

Kjo rregullore ka për qëllim përcaktimin e rregullave të funksionimit të Keshillit të Qarkut Vlorë në përmbushje të misionit të tij mbështetur në Kushtetutën; Ligjin nr.139/2015, "Për Vetëqeverisjen Vendore", i ndryshuar; akteve ligjore dhe nënligjore në Republikën e Shqipërisë.

Kjo rregullore përcakton rregullat për organizimin e mbledhjeve, administrimin e dokumentacionit, dhe procedurat e tjera për për organizimin dhe funksionimin e Këshillit të Qarkut Vlorë.

Neni 2

Qarku i Vlorës

Qarku i Vlorës si njësi e nivelit të dytë të vetëqeverisjes vendore, përfaqëson një unitet administrativo-territorial, të përbërë nga 7 (shtatë) bashki me lidhje gjeografike, tradicionale, ekonomike, sociale dhe interesa të përbashkëta. Kufijtë e qarkut përputhen me kufijtë e 7 (shtatë) bashkive që e përbëjnë atë, kjo sipas Ligjit Nr. 115/2014 "Për Ndarjen Administrativo-Territoriale të Njësive të Qeverisjes Vendore në Republikën e Shqipërisë". Qendra e qarkut është në Vlorë pjesë përbërëse e Bashkisë Vlorë.

2.Bashkitë përbërëse të Qarkut të Vlorës janë:

- Bashkia e Vlorës

Adresa: Këshilli I Qarkut Vlorë
www.qarkuvlore.gov.al
Sheshi "4 Heronjtë", Vlorë
Vlorë (AL)

Web site:

E-mail: info@qarkuvlore.gov.
Tel: +355 33 421 600



REPUBLIKA E SHQIPËRISË KËSHILLI I QARKUT VLORE

- Bashkia e Selenicës
- Bashkia e Himarës
- Bashkia e Delvinës
- Bashkia e Sarandës
- Bashkia e Finiqit
- Bashkia e Konispolit

Neni 3

Stema dhe vula e Këshillit të Qarkut

1. Këshilli përdor stemën e Republikës së Shqipërisë dhe vulën zyrtare të Këshillit të Qarkut, sipas legjislacionit në fuqi.
2. Këshilli i Qarkut, miraton me vendim Stemën e Qarkut.
3. Stema e Qarkut përdoret në mjediset e Këshillit të Qarkut dhe në mjediset e punës së Këshillit, në mjediset publike, në dokumente e akte të brendshme të Këshillit, në korrespondencën e Këshillit me të tretë, në botime e publikime të Këshillit, ose në veprimtaritë që organizohen nga Këshilli.

KREU II

FUNKSIONET DHE KOMPETENCAT E KËSHILLIT TË QARKUT

Neni 4

Statusi i Këshillit të Qarkut Vlorë

1. Këshilli i Qarkut Vlorë gëzon të drejtat, kryen funksionet dhe ushtron përgjegjësitë e përcaktuara në Kushtetutën e Republikës së Shqipërisë, Ligjin Nr. 139, datë 17.12.2015 "Për Vetëqeverisjen Vendore", i ndryshuar dhe në aktet e tjera ligjore dhe nënligjore përkatëse.
2. Këshilli i Qarkut Vlorë organizon dhe realizon veprimtarinë e tij në bazë të akteve ligjore dhe nënligjore në fuqi dhe në përputhje me rregulloren e miratuar prej tij. Kur gjatë zhvillimit të mbledhjes së Këshillit të Qarkut krijohen situata që nuk janë të parashikuara në ligj, akte nënligjore dhe në këtë rregullore, vendimi merret me shumicë

Adresa: Këshilli i Qarkut Vlorë
www.qarkuvlore.gov.al
Sheshi "4 Heronjtë", Vlorë
Vlorë (AL)

Web site:

E-mail: info@qarkuvlore.gov
Tel: +355 33 421 600



REPUBLIKA E SHQIPËRISË KËSHILLI I QARKUT VLORE

të thjeshtë votash të kuorumit të siguruar në këshill, me propozim të Kryetarit të Këshillit të Qarkut.

Neni 5

Funksionet e qarkut

1. Funksionet e qarkut janë ndërtimi dhe zbatimi i politikave rajonale, harmonizimi i tyre me politikat shtetërore, në nivel qarku, si dhe çdo funksion tjetër i dhënë me ligj.
2. Qarku ushtron të gjitha funksionet që i delegohen nga një ose më shumë bashki brenda territorit të qarkut, sipas një marrëveshjeje të lidhur midis palëve.
3. Qarku kryen dhe ushtron kompetencat e deleguara nga pushteti qendror, sipas parimeve të parashikuara në nenin 22 të ligjit 139/2015 "Për Vetëqeverisjen Vendore".

Neni 6

Detyrat dhe kompetencat e Këshillit të Qarkut

Këshilli i qarkut ushtron këto kompetenca dhe detyra:

- a) miraton rregulloren e brendshme të funksionimit të vet;
- b) Vendos për nivelin e ndihmesave financiare të detyrueshme të çdo bashkie përbërëse në buxhetin e qarkut;
- c) zgjedh nga anëtarët e këshillit kryetarin, zëvendëskryetarin dhe anëtarët e kryesisë, duke respektuar ligjin për barazinë gjinore, dhe i shkarkon ata;
- ç) emëron dhe shkarkon Sekretarin e këshillit të qarkut;
- d) miraton strukturën, organikën dhe kategoritë /klasat e pagave për çdo pozicion të shërbimit civil dhe rregulloret bazë të administratës së qarkut, të njësive e të institucioneve buxhetore në varësi të qarkut, si dhe numrin e personelit të tyre, kërkesat për kualifikim, pagat dhe mënyrat e shpërblimit të punonjësve e të personave të tjerë, të zgjedhur ose të emëruar, në përputhje me legjislacionin në fuqi;
- dh) miraton aktet e themelimit të ndërmarrjeve, shoqërive tregtare dhe të personave të tjerë juridikë që krijon vetë ose me të cilët është bashkëthemelues;



**REPUBLIKA E SHQIPËRISË
KËSHILLI I QARKUT VLORE**

- e) miraton buxhetin dhe ndryshimet e tij;
- ë) miraton tjetërsimin ose dhënien në përdorim të pronave të tretëve;
- f) organizon dhe mbikëqyr kontrollin e brendshëm;
- g) vendos për taksat e tarifat në kompetencë të qarkut, si dhe për nivelin e tyre;
- gj) vendos për marrjen e kredive dhe shlyerjen e detyrimeve ndaj të tretëve;
- h) vendos për krijimin e një personi juridik me njësi të tjera të vetëqeverisjes vendore, përfshirë subjektin e kompetencave të përbashkëta, sipas nenit 14 të ligjit 139/2015;
- i) emëron dhe shkarkon drejtuesit e ndërmarrjeve dhe të institucioneve në varësi të tij;
- j) vendos për fillimin e procedurave gjyqësore për çështje të kompetencës së vet;
- k) vendos për vërtetimin dhe heqjen e mandatit të këshilltarit të qarkut, sipas nenit 75 të ligjit 139/2015;
- l) miraton norma, standarde e kritere për rregullimin e disiplinimin e funksioneve që i janë dhënë atij me ligj, si dhe për mbrojtjen e garantimin e interesit publik në nivel qarku;
- ll) vendos për simbolet e Qarkut;
- m) jep tituj nderi dhe stimuj;
- n) vendos për rregullat, procedurat dhe mënyrat e realizimit të funksioneve të deleguara, në bazë dhe në zbatim të ligjit me të cilin bëhet ky delegim në qark;
- nj) miraton ose shfuqizon vendimet e Kryesisë së këshillit të qarkut.

KREU III

**KRIJIMI , MËNYRA E ORGANIZIMIT DHE FUNKSIONIMIT TË KËSHILLIT
TË QARKUT**

Neni 7

Numri dhe mënyra e zgjedhjes së anëtarëve të Këshillit të Qarkut

1. Këshilli i qarkut përbëhet nga përfaqësues të bashkive që bëjnë pjesë në qark. Këshilli i Qarkut Vlorë përbëhet nga 29 anëtarë, të cilët zgjidhen nga përfaqësues të 7 (shtatë)

*Adresa: Këshilli I Qarkut Vlorë
www.qarkuvlore.gov.al
Sheshi " 4 Heronjtë ", Vlorë
Vlorë (AL)*

Web site:

*E-mail: info@qarkuvlore.gov.
Tel: +355 33 421 600*



REPUBLIKA E SHQIPËRISË KËSHILLI I QARKUT VLORE

bashkive që bëjnë pjesë në qark, sipas mënyrës së përcaktuar në Kushtetutë dhe në kreun XIII të ligjit 139/2015 “Për Vetëqeverisjen Vendore”.

2. Kryetarët e bashkive, që bëjnë pjesë në qark, janë kurdoherë anëtarë të këshillit të Qarkut.

3. Numri i përfaqësuesve të bashkive përbërëse në këshillin e Qarkut përcaktohet dhe ndryshon sipas parashikimit të nenit 73 të ligjit 139/2015 “Për Vetëqeverisjen Vendore”.

4. Funksioni i anëtarit të këshillit të Qarkut është i papajtueshëm me çdo funksion në administratën e qarkut.

Neni 8

Mbledhja e parë e Këshillit të Qarkut

1. Këshilli i Qarkut zhvillon mbledhjen e tij të parë jo më vonë se 50 ditë nga data e shpalljes së rezultatit të zgjedhjeve vendore.

2. Mbledhja e parë thirret nga kryetari i bashkisë, qendër e qarkut, ose nga 1/3 e anëtarëve të Këshillit të Qarkut. Njoftimi për mbledhjen e Këshillit të Qarkut i dërgohet me shkrim të gjithë anëtarëve të këshillit të qarkut jo më vonë se 10 ditë para datës së mbledhjes.

3. Mbledhja e parë e këshillit është e vlefshme kur në të marrin pjesë jo më pak se gjysma e të gjithë anëtarëve të tij.

4. Mbledhja e parë e këshillit, deri në zgjedhjen e Kryetarit të Këshillit të Qarkut, drejtohet nga anëtari më i vjetër në moshë.

5. Në mbledhjen e tij të parë Këshilli i Qarkut:

- a) zgjedh komisionin e mandateve, i cili verifikon mandatet e anëtarëve të këshillit;
- b) vërteton mandatet e anëtarëve të këshillit;
- c) zgjedh kryetarin, zëvendëskryetarin dhe kryesinë e këshillit të qarkut, duke respektuar ligjin për barazinë gjinore.

6. Këshilli i Qarkut konstituohet pas vërtetimit të mandateve të jo më pak se gjysmës së të gjithë anëtarëve të tij.



REPUBLIKA E SHQIPËRISË
KËSHILLI I QARKUT VLORE

7. Nëse nuk sigurohet pjesëmarrja e gjysmës së të gjithë anëtarëve të këshillit të qarkut, mbledhja anulohet dhe thirret çdo dhjetë ditë, derisa të sigurohet shumica e nevojshme.

Neni 9

Mandati i Këshilltarit të Qarkut

1. Mandatin e këshilltarit të qarkut e fitojnë të gjithë kryetarët e bashkive përbërëse të tij menjëherë me marrjen e mandatit përkatës.
2. Zgjedhja e anëtarëve të Këshillit të Qarkut përfaqësues nga radhët e këshillit bashkiak, në përputhje me nenin 48, të ligjit 139/2015 "Për Vetëqeverisjen Vendore", bëhet me votimin e listës shumëmemërore të kandidatëve dhe shpallet fitues kandidati ose kandidatët që kanë marrë më shumë vota.
3. Anëtarit të Këshillit të Qarkut i mbaron mandati kur:
 - a) jep dorëheqjen
 - b) vdes
 - c) humbet mandatin si kryetar apo këshilltar i bashkisë
 - ç) vërtetohet se mandati është fituar në mënyrë të paligjshme.
 - d) nuk merr pjesë për më shumë se 3 mbledhje radhasi
4. Në rastin e krijimit të vendit vakant, që lidhet me humbjen e mandatit të anëtarit të këshillit të qarkut nga një anëtar i këshillit të një bashkie, ai zëvendësohet nga këshilli bashkiak përkatës, duke respektuar ligjin për barazinë gjinore.
5. Në rast se vendi vakant krijohet nga humbja e mandatit të anëtarit të këshillit të qarkut nga një kryetar bashkie në 6 muajt e fundit të mandatit, vendin e tij e zë kryetari i zgjedhur nga këshilli bashkiak përkatës.

Neni 10

Papajtueshmëria e funksionit të këshilltarit të Qarkut dhe pengesat ligjore

Funksioni i anëtarit të Këshillit të Qarkut është i papajtueshëm me çdo funksion në administratën e qarkut.



REPUBLIKA E SHQIPËRISË
KËSHILLI I QARKUT VLORE

1. Anëtari i Këshillit të Qarkut nuk përfshihet në një procedurë shqyrtimi dhe vendimmarrëse në rastet kur:

a) ka një interes personal të drejtpërdrejtë ose jo të drejtpërdrejtë në vendimmarrjen në shqyrtim.

b) bashkëshorti, bashkëjetuesi ose të afërmit e tij deri në shkallë të dytë kanë një interes të drejtpërdrejtë ose jo të drejtpërdrejtë në vendimmarrjen në shqyrtim.

c) ai ose edhe personat e parashikuar në shkronjën "b", kanë një interes të drejtpërdrejtë ose jo të drejtpërdrejtë në një çështje objektivisht të njëjtë dhe me të njëjtat rrethana ligjore me çështjen në shqyrtim.

ç) ai ka marrë pjesë si ekspert, këshilltar, përfaqësues ose avokat privat në çështjen në shqyrtim.

d) personat e përmendur në shkronjën "b", kanë marrë pjesë si ekspertë përfaqësues, këshilltarë apo avokatë në çështjen në shqyrtim.

dh) ai ose personat e përmendur në shkronjën "b", janë debitorë ose kreditorë të palëve të interesuara në çështjen në shqyrtim.

e) ai ose personat e përmendur në shkronjën "b", të kësaj pike, kanë marrë dhurata nga palët

përpara ose pas fillimit të procedurës së shqyrtimit.

ë) ai ose personat e përmendur në shkronjën "b", kanë marrëdhënie të tilla, të cilat vlerësohen, sipas rrethanave konkrete, se do të përbënin arsye serioze për njëanshmëri me palët në procedurën në shqyrtim.

f) në çdo rast parashikohet nga legjislacioni në fuqi;

g) ai ose personat e përmendur në shkronjën "b", janë përfshirë në çdo lloj mënyre në negocime të mundshme për punësim në të ardhmen të tij apo të personave të përmendur në shkronjën "b", gjatë ushtrimit të funksionit apo në negocime për çdo lloj forme tjetër marrëdhëniesh me interes privat, pas lënies së detyrës, të kryera nga ai gjatë ushtrimit të detyrës.

2. Nëse anëtari i këshillit të qarkut vëren një nga pengesat e parashikuara në pikën 1, të këtij neni, ai njofton menjëherë me shkrim kryetarin e këshillit të qarkut.



REPUBLIKA E SHQIPËRISË KËSHILLI I QARKUT VLORE

3. Persona të tretë mund të kërkojnë përjashtimin e pjesëmarrjes së një anëtarit të këshillit të qarkut nga një procedurë, deri në kohën e marrjes së vendimit, duke parashtruar arsyet për të cilat kërkohet përjashtimi nga shqyrtimi dhe vendimmarrja. Kërkesa bëhet me shkrim, i drejtohet kryetarit të këshillit të qarkut dhe përmban të gjitha provat e mundshme në të cilat ajo mbështetet.

4. Kryetari i këshillit të Qarkut, i njoftuar sipas pikave 2 dhe 3, të këtij neni, i propozon këshillit të qarkut përjashtimin ose konfirmimin e anëtarit të këshillit të qarkut nga/në procedura vendimmarrëse.

Neni 11

Të drejtat e këshilltarit

1. Me kërkesën e tij këshilltari informohet dhe i vihet në dispozicion në çdo kohë nga administrata e këshillit të qarkut, çdo lloj dokumentacioni për njohje të problemeve të juridiksionit të saj.

2. Punëdhënësi detyrohet të lejojë anëtarin e këshillit të Qarkut të shkëputet nga puna për të marrë pjesë në mbledhjet e këshillit të Qarkut, komisioneve të tij apo aktivitete të organizuara prej këshillit të Qarkut.

3. Këshilltari nuk përgjigjet për mendime të shprehura, lidhur me çështje zyrtare gjatë ushtrimit të detyrës.

4. Këshilltari ka të drejtën e kualifikimit profesional, sipas programit të miratuar nga këshilli dhe të financuar sipas legjislacionit përkatës.

5. Këshilltarët kanë të drejtën e iniciativës së përfshirjes së çdo çështjeje, që ata mendojnë të shqyrtohet dhe të vendimohet në këshill. Ata ushtrojnë të drejtën e prezantimit të projekt-vendimeve dhe amendamenteve të tyre mbi çështjet e rendit të ditës, në mbledhjen e Këshillit të Qarkut. Amendamentet janë propozime për korrektimin e formës, rregullimin tërësor ose ndryshime dhe plotësime të pjesshme të tekstit të projekt-vendimeve, para se për ta të votohet nga këshilli.

6. Këshilltarët kanë të drejtën e përgatitjes dhe paraqitjes së pyetësorëve, kërkesës së interpelancave dhe mocioneve mbi çështje që lidhen drejtpërdrejtë me kryerjen e funksionit.



REPUBLIKA E SHQIPËRISË KËSHILLI I QARKUT VLORE

- a) **Pyetësi** është kërkesa e këshilltarit, grup këshilltarësh dhe grup politik këshilltarësh drejtuar kryetarit të këshillit të qarkut, për të marrë informacionin përkatës për gjendje të krijuara nga drejtimi dhe administrimi i shërbimeve publike, që lidhen me ushtrimin e funksioneve të kryetarit dhe administratës. Pyetësi është formulim i një ose disa pyetjeve, përgjigja e të cilave jepet me shkrim dhe verbalisht nga kryetari ose i autorizuari prej tij, në mbledhjen e këshillit. Pyetjet duhet të jenë të formuluar qartë dhe në mënyrë të përmbledhur. Pyetjet lexohen në mbledhjen e këshillit nga një këshilltar që ka firmosur pyetësin. Kryetari ose personi i autorizuar ju përgjigjet pyetjeve, sipas rendit të tyre. Procesi ezaurohet pa debat.
- b) **Interpelanca** është kërkesa me shkrim e një grup këshilltarësh (të paktën 1/3 e numrit të përgjithshëm të këshilltareve) drejtuar kryetarit të këshillit të qarkut për t'u informuar prej tij për zbatimin e vendimmarrjeve të këshillit të qarkut. Interpelanca mund të tjetërsohet në mocion, kur ka arsye të faktura ose konstatohet gjatë dhënies së interpelancës në këshill, mungesë përgjegjësie në kryerjen e detyrave dhe kompetencave të kryetarit, zv/kryetarit, drejtuesve të ndërmarrjes së vartësisë ose sekretarit të këshillit. Interpelanca kthehet në mocion vetëm atëherë kur këshilli nga vlerësimi i interpelancës vendos, organizon dhe zhvillon debat mbi objektin e interpelancës. Në këtë rast këshilli merr vendim mbi mocionin e ngritur.
- c) **Mocioni** është një propozim konkret me shkrim i një grup këshilltarësh ose grup politik këshilltarësh, mbi çështje të drejtimit dhe administrimit të këshillit të qarkut, i argumentuar ligjërisht, për vendimmarrje në këshill. Mocioni është i vlefshëm kur firmoset nga te paktën 1/3 e numrit të përgjithshëm të këshilltarëve dhe miratohet me debat me 50% + 1 të votave të numërit të përgjithshëm të këshilltarëve.

Neni 12

Funksionimi i Këshilli të Qarkut

1. Këshilli i Qarkut ushtron kompetencat nga çasti i konstituimit të tij deri në konstituimin e këshillit pasardhës.
2. Këshilli i Qarkut zhvillon mbledhje të hapura për publikun, zhvillon seanca këshillimi me organet përfaqësuese e ekzekutive të bashkive dhe me bashkësitë përkatëse, si dhe respekton të drejtën e publikut për t'u informuar.

Adresa: Këshilli i Qarkut Vlorë
www.qarkuvlore.gov.al
Sheshi "4 Heronjtë", Vlorë
Vlorë (AL)

Web site:

E-mail: info@qarkuvlore.gov
Tel: +355 33 421 600



REPUBLIKA E SHQIPËRISË
KËSHILLI I QARKUT VLORE

3. Mbledhja e radhës e Këshillit të Qarkut bëhet jo më pak se një herë në tre muaj.
4. Mbledhjet zhvillohen sipas programit të punës që bën këshilli.
5. Këshilli i Qarkut mbledhet jashtë radhe me kërkesë:
 - a) të Kryetarit të tij.
 - b) të Kryesisë së këshillit.
 - c) të një të tretës së anëtarëve të këshillit.
 - ç) të Prefektit për çështje që lidhen me ushtrimin e funksioneve të tij.
6. Thirrja e mbledhjes së këshillit bëhet nga Kryetari.
7. Mbledhja e Këshillit të Qarkut quhet e vlefshme, kur në të merr pjesë shumica e të gjithë anëtarëve të tij.
8. Njoftimi për mbledhjen e këshillit bëhet, si rregull, 10 ditë para datës së zhvillimit të mbledhjes. Në rast situatash emergjente, njoftimi mund të bëhet jashtë afatit të përcaktuar në pikën 4 të këtij neni dhe këshilli vendos për miratimin e rendit të ditës me shqyrtimin e projektakteve që vlerësohen të tilla. Njoftimi përmban datën e mbledhjes, orën, vendin dhe rendin e ditës.
9. Njoftimi për mbledhjen e këshillit bëhet publik nga ana e Sekretarit të këshillit, në vende të caktuara për këtë qëllim brenda territorit të njësisë vendore dhe në media të aksesueshme në njësinë vendore dhe përmban datën, vendin, orën dhe rendin e ditës së mbledhjes.
10. Me kërkesën e Kryetarit të Këshillit të Qarkut ose të një të pestës së anëtarëve të këshillit, mbledhjet e Këshillit të Qarkut mund të bëhen të mbyllura, kur për këtë kanë votuar jo më pak se tre të pestat e gjithë anëtarëve të tij.
11. Këshillimi me publikun, në çdo rast, bëhet në varësi të problematikave, duke përdorur një nga formatat e nevojshme, si takimet e hapura me banorët e grupet e interesit, takime me specialistë, me institucione të interesuara dhe organizata jofitimprurëse ose nëpërmjet marrjes së nismës për organizimin e referendumeve vendore.
12. Aktet e këshillit publikohen në faqen zyrtare të internetit dhe afishohen në vende publike, të caktuara nga këshilli me akses të lirë publik, brenda territorit të njësisë vendore dhe sipas mundësive, këshilli cakton edhe forma të tjera të publikimit të tyre.



REPUBLIKA E SHQIPËRISË KËSHILLI I QARKUT VLORË

Neni 13

Selia e mbledhjeve

Mbledhjet e Këshillit të Qarkut zhvillohen, si rregull, pranë godinës së qarkut Vlorë, në një sallë të posaçme. Pjesa kryesore e sallës është e destinuar për anëtarët e Këshillit të Qarkut, sekretarinë dhe përfaqësuesit e administratës që kanë përgatitur projektet. Një hapësirë e posaçme i rezervohet publikut, duke i siguruar atij mundësinë e plotë për të ndjekur punimet e këshillit. Një hapësirë e përcaktuar u vihet në dispozicion përfaqësuesëve të mjeteve të informacionit.

Neni 14

Zhvendosja e selisë së mbledhjeve

Kryetari i këshillit të qarkut me miratim të Kryesisë së këshillit të qarkut mund të zhvendosë zhvillimin e mbledhjes së këshillit të qarkut, në një ambient tjetër, kur ajo bëhet e nevojshme nga papërshtatshmëria dhe jo disponibiliteti i sallës përkatëse, ose motivohet për arsye sociale dhe humane. Mbledhja mund të zhvendoset gjithashtu në territorin e një prej bashkive të qarkut, të ndryshme nga bashkia qendër qarku. Në këtë rast Sekretari merr kontakt me bashkinë pritëse dhe organizon zhvillimin e mbledhjes.

Në të gjitha rastet, në ambientin ku do të zhvillohet mbledhja, vendosen në vende të dukshme flamuri kombëtar dhe flamuri me stemën e Këshillit të Qarkut Vlorë.

KREU IV

ORGANET E KËSHILLIT TË QARKUT

Neni 15

Organet e qeverisjes vendore të Këshillit të Qarkut Vlorë

1. Në Këshillin e Qarkut Vlorë funksionojnë:

a) Kryetari dhe Kryesia e Këshillit të Qarkut Vlorë si organe që ushtrojnë funksionet ekzekutive.



REPUBLIKA E SHQIPËRISË KËSHILLI I QARKUT VLORE

b) Këshilli i qarkut si organ përfaqësues i Qarkut.

2. Në përputhje me ligjin, organet e Këshillit të Qarkut Vlorë ndërmarrin nisma me interes publik vendor në territorin e juridiksionit të tyre për çdo çështje që nuk u ndalohet me ligj, sikundër janë ndërtimi e zbatimi i politikave rajonale, harmonizimi i tyre me politikat shtetërore, në nivel qarku të cilat i ushtrojnë duke nxjerrë vendime, urdhëresa dhe urdhëra.

Neni 16

Kryesia e Këshillit të Qarkut kompetencat

1. Kryesia e këshillit të qarkut Vlorë përbëhet nga kryetari, zëvendëskryetari dhe nga 5 anëtarë të tjerë.
2. Anëtarët e kryesisë së këshillit të qarkut zgjidhen dhe shkarkohen nga Këshilli me votim, me listë shumemërore kandidatësh, dhe shpallen fitues kandidatët që kanë marrë më shumë vota.
3. Kryesia e këshillit të qarkut thirret në mbledhje nga Kryetari, jo më pak se një herë në muaj.
4. Mbledhjet e kryesisë janë të vlefshme kur marrin pjesë më shumë se gjysma e anëtarëve.

Neni 17

Kompetencat e Kryesisë së Këshillit të Qarkut

Kryesia e këshillit të qarkut ka këto kompetenca dhe detyra:

- a) ushtron të gjitha kompetencat, me përjashtim të atyre që i janë dhënë shprehimisht Këshillit të Qarkut.
- b) miraton projektaktet dhe materialet e tjera për mbledhjen e Këshillit të Qarkut, në përputhje me rendin e ditës, të përcaktuar nga këshilli, si dhe për probleme të kërkuara nga ajo vetë.
- c) raporton në këshill për gjendjen ekonomiko-financiare, të paktën çdo 6 muaj ose më shpesh, sa herë kërkohet nga këshilli.

Adresa: Këshilli i Qarkut Vlorë
www.qarkuvlore.gov.al
Sheshi "4 Heronjtë", Vlorë
Vlorë (AL)

Web site:

E-mail: info@qarkuvlore.gov
Tel: +355 33 421 600



REPUBLIKA E SHQIPËRISË
KËSHILLI I QARKUT VLORE

ç) raporton në këshill sa herë kërkohet prej tij për probleme të tjera që kanë të bëjnë me funksionet e Qarkut.

d) ushtron të drejtat dhe siguron plotësimin e të gjitha detyrimeve që i janë ngarkuar qarkut si person juridik.

6. Në ushtrimin e kompetencave të saj, Kryesia e këshillit të qarkut nxjerr vendime, të cilat miratohen nga shumica e anëtarëve të pranishëm. Vendimet marrin fuqi detyruese për t'u zbatuar nga të gjitha organet dhe personat e ngarkuar, pasi shpallen publikisht ose u bëhen të njohura subjekteve të interesuara.

7. Vendimet e Kryesisë duhet të miratohen në mbledhjen më të afërt të Këshillit të Qarkut, në të kundërt e humbasin fuqinë e tyre që nga fillimi.

Neni 18

Kryetari i Këshillit të Qarkut

1. Kryetari i Këshillit të Qarkut, zgjidhet me shumicën e votave të numrit të përgjithshëm të anëtarëve, kur nuk sigurohet shumica e kërkuar, votimi ribëhet midis dy kandidatëve, që në raundin e parë kanë fituar numrin më të madh të votave.

2. Kryetari i këshillit të qarkut përfaqëson këshillin e qarkut në marrëdhënie me organe shtetërore, me organet e njërive të vetëqeverisjes vendore, me persona fizikë dhe juridikë, vendas ose të huaj, si dhe ushtron këto kompetenca:

a) kryeson mbledhjet e këshillit të qarkut dhe të kryesisë së tij;

b) nënshkruan të gjitha aktet dhe procesverbalet e mbledhjeve të këshillit dhe të kryesisë së këshillit;

c) siguron zbatimin e vendimeve të Këshillit të Qarkut dhe të Kryesisë së tij;

ç) në përputhje me tematikën e mbledhjeve të Këshillit të Qarkut dhe të Kryesisë, përgatit raportet, projektvendimet dhe materialet e tjera të nevojshme;

d) drejton administratën e Këshillit të Qarkut dhe përgjigjet para këshillit për funksionimin e saj;

dh) organizon ristrukturimin organizativ të institucionit;

e) emëron dhe shkarkon personelin e administratës së Këshillit të Qarkut, përveç rasteve të parashikuara ndryshe në ligjin për nëpunësin civil;



**REPUBLIKA E SHQIPËRISË
KËSHILLI I QARKUT VLORE**

ë) merr masa dhe siguron funksionim normal të të gjitha strukturave të këshillit, të mbledhjeve të këshillit dhe të Kryesisë së tij;

f) garanton kryerjen e funksioneve që i janë dhënë me ligj Këshillit të Qarkut;

g) ushtron kompetenca të tjera, që i ngarkohen me ligj, nga Këshilli i Qarkut ose nga Kryesia e tij.

3. Në ushtrimin e kompetencave të tij, kryetari i Këshillit të Qarkut nxjerr urdhra me karakter individual.

4. Në mungesë ose me delegim të kryetarit, funksionet e tij kryhen nga zëvendëskryetari.

5. Miraton objektivat, programet vjetore dhe periodike të punës dhe kërkon llogari për plotësimin e tyre cilësisht dhe në kohën e parashikuar.

6. Krijon grupe të ndryshme pune me specialistë të vaçantë sipas fushave përkatëse për të realizuar studime afat-shkurtra, afat-mesme dhe afat-gjata si dhe miraton programet përkatëse sipas fushave të ndryshme.

7. Raporton para Këshillit të Qarkut, sa here kërkohet nga ky i fundit, për probleme që kanë të bëjnë me funksionet e tij. Në varësi të problematikës, kërkon raporte nga ndërmarrjet, institucionet apo subjektet e ndryshme që kanë lidhje me detyra që lidhen me problemin në fjalë.

Neni 19

Zëvendës Kryetari i Këshillit të Qarkut

1. Zv/kryetari i Këshillit të Qarkut, zgjidhet me shumicën e votave të numrit të përgjithshëm të anëtarëve, kur nuk sigurohet shumica e kërkuar, votimi ribëhet midis dy kandidatëve, që në raundin e parë kanë fituar numrin më të madh të votave. Shkarkimi i zëvendëskryetarit të Këshillit të Qarkut bëhet me shumicën e votave të numrit të përgjithshëm të anëtarëve.

2. Zv/kryetari i Këshillit të Qarkut kryen këto detyra:

a) Në mungesë të Kryetarit, drejton mbledhjen e Këshillit dhe nënshkruan aktet e miratuara prej tij, bazuar në pikën 3 të nenit 83, të ligjit 139/2015 "Për Vetëqeverisjen Vendore".



REPUBLIKA E SHQIPËRISË
KËSHILLI I QARKUT VLORE

- b) Zbaton me përpikmëri kompetencat e deleguara nga Kryetari i Këshillit të Qarkut dhe pergjigjet para tij për realizimin e funksioneve të deleguara.
- c) Drejtorët e drejtorive dhe nëpunësit e tjerë të administratës së Këshillit të Qarkut, drejtuesit e ndërmarrjeve dhe institucioneve janë të detyruar të njohin dhe zbatojnë njëloj dokumentat e firmosura nga zëvendëskryetari dhe detyrat e lëna prej tij.

Neni 20

Sekretari i Këshillit të Qarkut

1. Sekretari i Këshillit të Qarkut, emërohet dhe shkarkohet nga Këshilli i Qarkut, në bazë të propozimit të Kryetarit të Këshillit të Qarkut, me shumicën e votave të të gjithë anëtarëve të këshillit.
2. Sekretari i Këshillit të Qarkut është përgjegjës dhe kryen këto detyra:
 - a) mbajtjen e dokumenteve zyrtare të këshillit dhe siguron zbatimin e ligjit mbi arkivat për ruajtjen e këtyre dokumenteve.
 - b) ndjekjen e punës për përgatitjen e materialeve të mbledhjeve, sipas rendit të ditës.
 - c) njofton këshilltarët, median dhe publikun për zhvillimin e mbledhjes së këshillit;
 - ç) mbajtjen e procesverbalit të mbledhjes së këshillit;
 - ç) shpalljen dhe publikimin e njoftimeve e të akteve të nxjerra nga Këshilli i Qarkut;
 - d) përgatitjen e seancave të këshillimit me bashkësinë;
 - dh) mbikëqyrjen e respektimit të rregullores së funksionimit të Këshillit të Qarkut;
 - e) vërtetimin e saktësisë dhe të nënshkrimit të protokollit të mbledhjeve të Këshillit të Qarkut;
 - ë) mban numrin rendor të vendimeve të Këshillit dhe vendimeve të Kryesisë të këshillit në një regjistër të posaçëm;
 - f) ndjek respektimin e procedurave të konfirmimit të ligjshmërisë pranë Prefektit të Qarkut për të gjitha aktet e miratuara në mbledhjen e Këshillit të Qarkut, brenda 7 ditëve nga data e shpalljes se tyre;



REPUBLIKA E SHQIPËRISË
KËSHILLI I QARKUT VLORE

g) mban marrëdhëniet me publikun sipas përcaktimeve të Ligjit 119/2014 "Për të drejtën e informimit" dhe përgatit programin e transparencë së Këshillit;

gj) mban marrëdhëniet me median dhe organizatat e shoqërisë civile;

gj) përgatit linjën buxhetore të nevojshme për realizimin e mbledhjeve të Këshillit;

gj) harton raportin përmbledhës të mbledhjes së Këshillit, i cili lexohet nga Kryetari, e më pas e bën publik.

3. Sekretari i këshillit të Qarkut kryen çdo funksion tjetër që i caktohet nga kryetari apo vetë Këshilli i Qarkut;

4. Të drejtat dhe detyrat e tij që rrjedhin nga marrëdhënia e punësimit janë të përcaktuara sipas legjislacionit në fuqi.

Neni 21

Grupet e këshilltarëve

1. Këshilltarët mund të grupohen në përputhje me orientimin e tyre politik. Këshilltari mund të marrë pjesë vetëm në një grupim politik. Këshilltarët nuk mund të formojnë grupim mbi bazë interesash etnike. Formimi i grupeve të këshilltarëve, si rregull, bëhet brenda 2 muajve (mbledhjeve të para) nga konstituimi i Këshillit të Qarkut. Numri minimal për formimin e një grupi është 3 këshilltarë.

2. Kushtet për anëtarësimin në grup, për largimin nga grupi, të drejtat dhe detyrat e tyre brenda grupit, përcaktohen nga vetë grupi i këshilltarëve. Çdo grupim politik, paraqet tek Kryetari i Këshillit të Qarkut, listën e anëtarëve dhe kryetarin dhe zv/kryetarin e tij.

3. Në mbledhjen e afërt të Këshillit, Kryetari shpall përbërjen e grupit dhe drejtuesit e tij. Këshilltari, mund të largohet nga një grup, duke e deklaruar atë në mbledhjen e grupit dhe të këshillit. Ndryshimet në grupet e këshilltarëve dhe të drejtuesve të tyre, i bëhen të ditur Kryetarit të Këshillit dhe regjistrohen nga sekretari.

4. Grupet e këshilltarëve, mund t'i zhvillojnë mbledhjet e tyre në mjediset e Këshillit. Sekretari i Këshillit, merr masa për sigurimin e mjediseve të përshtatshme duke koordinuar më parë me drejtuesit e grupit.



**REPUBLIKA E SHQIPËRISË
KËSHILLI I QARKUT VLORE
KREU V**

KOMISIONET E KËSHILLIT TË QARKUT

Neni 22

Komisionet e përhershme

Këshilli i Qarkut, për kryerjen e funksioneve të tij, mund të krijojë komisione të përhershme e të përkohshme. Komisionet kryejnë detyra për njohjen dhe zbatimin e akteve ligjore dhe nënligjore në fusha të ndryshme të veprimtarisë së Këshillit të Qarkut. Numri dhe përbërja emërore e anëtarëve të komisioneve, miratohet nga këshilli me votim të hapur, me propozim të Kryetarit të këshillit, pas konsultimeve me kryetarët e grupeve. Komisionet e përkohshme ngrihen sipas rastit dhe nevojave për shqyrtimine problematikave të ndryshme që mund të hasen gjatë funksionimit të Këshillit të Qarkut Vlorë. Një këshilltar, mund të bëjë pjesë vetëm deri në dy komisione të përhershme.

Neni 23

Veprimtaria e komisioneve të përhershme

Veprimtaria e komisioneve të përhershme, bazohet në legjislacionin përkatës, në këtë rregullore dhe në rregulloret e funksionimit të tyre. Komisionet e përhershme shqyrtojnë raporte, projekte, studime e relacione të Këshillit të Qarkut, të ndërmarrjeve dhe institucioneve në vartësi të tij dhe bëjnë vlerësimet përkatëse për to. Komisionet e përhershme mund të hartojnë edhe vetë p/vendime, rregullore dhe urdhëra të cilat shoqërohen me relacionet përkatëse. Nëpunësit e administratës së Këshillit të Qarkut, si dhe ato të ndërmarrjeve dhe institucioneve në vartësi të saj, janë të detyruar t'iu vënë në dispozicion këshilltarëve të dhënat që kërkojnë në përputhje me legjislacionin përkatës.

Neni 24

Mbledhjet e komisioneve të përhershme

Komisionet e përhershme mbledhen nga Kryetari i këshillit të qarkut ose me kërkesën e 1/3 të anëtarëve të komisionit. Mbledhja e një komisioni, quhet e vlefshme, kur në të marrin pjesë më shumë se gjysma e anëtarëve të tij. Mbledhjet e komisioneve zhvillohen të hapura, me përjashtim të rasteve kur komisioni vendos ndryshe. Komisioni, pasi shqyrton dhe voton projekt-aktet e paraqitura, përgatit një relacion, i cili paraqitet në mbledhjen e Këshillit.

Neni 25

*Adresa: Këshilli i Qarkut Vlorë
www.qarkuvlore.gov.al
Sheshi " 4 Heronjtë ", Vlorë
Vlorë (AL)*

Web site:

*E-mail: info@qarkuvlore.gov.
Tel: +355 33 421 600*



REPUBLIKA E SHQIPËRISË
KËSHILLI I QARKUT VLORE
Komisionet e përkohshme

Këshilli i Qarkut, mund të krijojë edhe komisione të përkohshme pune për studime, ose për përgatitje projekt-vendimesh në fusha të caktuara dhe në varësi të situatave të caktuara që mund të krijohen. Propozimi për krijimin e tyre, mund të bëhet nga së paku 8 këshilltarë, ose nga një grup këshilltarësh. Mënyra e krijimit dhe e funksionimit të tyre, është e njëjtë me atë të komisioneve të përhershme. Kohëzgjatja e veprimtarisë, përcaktohet në aktin e krijimit të tyre, por nuk mund të jetë më shumë se 6 muaj.

Neni 26

Kontrolli i brendshëm Financiar

1. Me propozim të Kryesisë, këshilli mund të miratojë krijimin e një komisioni Financiar, prej jo më pak se 3 këshilltarësh. Përfaqësues të organit ekzekutiv dhe nëpunës të administratës së tij, nuk mund të bëjnë pjesë në këtë komision. Komisioni Financiar, funksionon gjatë gjithë periudhës së mandatit të këshillit dhe kontrollon të ardhurat dhe shpenzimet e kryera nga organi ekzekutiv në përputhje me buxhetin e miratuar nga Këshilli. Organi ekzekutiv i raporton komisionit në mënyrë periodike gjatë vitit dhe i dorëzon atij një kopje të dokumentacionit kontabël dhe financiar përkatës. Komisioni Financiar, raporton në Këshillin e Qarkut, përfundimet që dalin nga kontrollet e ushtruara dhe merr vendimin përkatës.

2. Komisioni Financiar, Kryesia ose Këshilli i Qarkut, ka të drejtë, duke respektuar legjislacionin në fuqi, të kërkojë auditim të jashtëm të llogarive me ekspertë kontabël të autorizuar, kur gjykon se është e nevojshme.

KREU VI

PARAQITJA E PROJEKT-AKTEVE, PROCEDURA E ZHVILLIMIT TË
MBLEDHJEVE DHE VENDIMARRJA

Neni 27

Përgatitja dhe propozimi i projekt-akteve në Këshillin e Qarkut

Kanë të drejtë të përgatisin dhe propozojnë projekt-akte në Këshillin e Qarkut, Kryetari i këshillit, grupet e këshilltarëve, komisionet e përhershme, si dhe çdo këshilltar. Projekt vendimet e propozuara nga këshilltarët do të përgatiten me asistencën e Drejtorisë/Sektorit përkatës të administratës së Këshillit të Qarkut. Për projektet me

Adresa: Këshilli i Qarkut Vlorë
www.qarkuvlore.gov.al
Sheshi "4 Heronjtë", Vlorë
Vlorë (AL)

Web site:

E-mail: info@qarkuvlore.gov
Tel: +355 33 421 600



REPUBLIKA E SHQIPËRISË KËSHILLI I QARKUT VLORE

karakter financiar, duhet të merret më parë mendimi i organit ekzekutiv. Në përputhje me rendin e ditës të miratuar, propozuesi i paraqet projekt-aktin Sekretarit të këshillit, jo më vonë se 15 ditë përpara datës së mbledhjes së rradhës, të cilat rregjistrohen në librin e akteve të Këshillit.

Neni 28

Organizimi i shqyrtimit të projekt-aktit

Projekt-vendimet, i paraqiten Kryetarit të këshillit, nepermjet Sekretarit të këshillit, së bashku me relacionin shpjegues i cili duhet të përmbajë:

- i. arsyetimin e hollësishëm ligjor dhe faktik të projekt-vendimit,
- ii. mendimin e kualifikuar juridik për konformitetin e projekt-vendimit me legjislacionin në fuqi,
- iii. dokumentat e nevojshëm, që lejojnë vlerësimin e domosdoshmërisë së miratimit të projekt-vendimit të propozuar,
- iv. paraqitja e burimeve të financimit dhe të kostove të realizimit të projekt-vendimit të propozuar, nese ka,
- v. të dhënat e personit/sectorit i cili do të përfaqësojë dhe do të mbrojë projekt-vendimin e propozuar në mbledhjet e komisioneve apo të këshillit,

Relacioni shpjegues firmoset nga Personi/Përgjegjësi i sektorit që e ka përgatitur.

Projekt-vendimi firmoset nga Sekretari i këshillit dhe Drejtori ose Përgjegjësi i sektorit që ka përgatitur projekt vendimin dhe regjistrohen në librin e akteve të Këshillit. Në qoftë se vërehen mungesa formale në projekt-vendimin e propozuar, atëherë Sekretari i këshillit ia kthen projekt-vendimin propozueseve, me qëllim plotësimin e mungesave formale te konstatuara.

Neni 29

Procedura e zhvillimit të mbledhjeve

Mbledhja e këshillit drejtohet nga Kryetari ose zv/Kryetari. Drejtuesi i mbledhjes, pas verifikimit të pjesmarrjes nga Sekretari, deklaron hapjen e mbledhjes, komunikon rendin e ditës dhe paraqet për votim propozimet për ndryshime të mundshme të tij. Për të siguruar një ecuri normale dhe efektive të mbledhjeve të Këshillit ndiqet kjo procedurë:

Adresa: Këshilli I Qarkut Vlorë
www.qarkuvlore.gov.al
Sheshi "4 Heronjtë", Vlorë
Vlorë (AL)

Web site:

E-mail: info@qarkuvlore.gov.
Tel: +355 33 421 600



REPUBLIKA E SHQIPËRISË
KËSHILLI I QARKUT VLORE

- Shprehet mendimi mbi projekt-aktin e paraqitur. Nëpunësi i administratës relatohet mbi çështjen e shënuar si pikë në rendin e ditës.
- Drejtohen pyetje nga këshilltarët.
- U jepet përgjigje, pyetjeve të këshilltarëve.
- Diskutime nga këshilltarët.
- Votohen propozimet për ndryshime të mundëshme në projekt, sipas rradhës së paraqitjes së tyre e më pas votohet p/vendimi në tërësi.
- Drejtuesi fton këshilltarët të votojnë me karton ose ngritjen e dorës duke iu ofruar opsionet Pro, Kundra, Abstenim. Pas numërimit të votave nga sekretaria drejtuesi deklaron miratimin ose jo të pikës së rendit të ditës në diskutim.

Neni 30

Pjesëmarrja në mbledhjen e Këshillit të këshilltarit, nëpërmjet Sistemit AudioVideo (SAV)

1. Në rastin kur një këshilltar nuk është në gjendje të jetë i pranishëm fizikisht në një mbledhje të këshillit, por do të dëshironte të përfshihej në diskutimin dhe/ose vendimin për një çështje të veçantë të rendit të punëve, ai/ajo lejohet të marrë pjesë nëpërmjet Sistemit AudioVideo (SAV).
2. Procedurat për lejimin e këshilltarit për të marrë pjesë në mbledhje nëpërmjet SAV janë si më poshtë:
 - a. Pjesëmarrja e këshilltarit në mbledhjen e këshillit, nëpërmjet sistemit audiovideo duhet të jetë një përjashtim, jo rregull. Shembuj të rasteve kur këshilltari mund të jetë i pranishëm përmes SAV përfshijnë, por nuk kufizohen vetëm në:
 - Një pikë e rendit të ditës duhet të shqyrtohet dhe miratohet me urgjencë nga këshilli dhe pjesëmarrja përmes SAV është e nevojshme për të mundësuar kuorumin, në këtë rast nevojën për pjesëmarrje e përcakton Kryetari/Kryesuesi i Mbledhjes dhe vetë këshilltari;
 - Një pikë e rendit të ditës ka një rëndësi shumë të madhe për këshilltarin që nuk mund të jetë fizikisht i pranishëm;



REPUBLIKA E SHQIPËRISË KËSHILLI I QARKUT VLORE

- Është shumë e rëndësishme që të gjithë këshilltarët të përfshihen në marrjen e vendimit, por kur një këshilltar nuk është në gjendje të jetë i pranishëm fizikisht, nevojën për pjesëmarrja përmes SAV e përcakton Kryetari/Kryesuesi i Mbledhjes dhe vetë këshilltari;
- b. Nëse një këshilltar dëshiron të marrë pjesë në një mbledhje të këshillit përmes SAV për një çështje të rendit të ditës, këshilltari duhet të njoftojë Sekretarin e këshillit për dëshirën e tij/saj për të marrë pjesë përmes SAV, përpara mbledhjes në të cilën ai dëshirojnë të marrë pjesë. Ky njoftim duhet të bëhet gjatë procesit të miratimit të rendit paraprak të ditës së mbledhjes ku kërkohet të merret pjesë. Në njoftim këshilltari specifikon arsyen e mos marrjes pjesë fizikisht. Nëse kjo nuk është e mundur, këshilltari duhet ta njoftojë Kryetarin apo Sekretarin e këshillit për dëshirën e tij /saj për të marrë pjesë në një mbledhje të këshillit përmes SAV, jo më vonë se brenda orarit zyrtar të ditës së punës para mbledhjes së këshillit për të cilin ai ose ajo dëshiron të marrë pjesë.

Neni 31

Rradha e diskutimeve

Këshilltari fillon diskutimin, pasi i jepet fjala nga drejtuesi i seancës. Këshilltari e kërkon fjalën me ngritjen e dorës ose me shkrim. Këshilltari diskuton vetëm një herë për problemin që shqyrtohet. Kryetari i këshillit, përcakton rradhën e diskutimeve, duke mbajtur parasysh kohën e kërkesës, si dhe kombinimin e grupeve të këshilltarëve. Kryetarët e grupeve kanë të drejtë të diskutojnë jashtë rradhe, në rast se e kërkojnë fjalën. Këshilltari mund të flasë nga vendi, në këmbë ose ulur, sipas zgjedhjes së tij.

Neni 32

Çështjet procedurale

Këshilltarit, i jepet fjala menjëherë për çështjet procedurale që prekin zbatimin e kësaj rregulloreje, vecanërisht të zhvillimit të mbledhjeve të Këshillit. Çështjet procedurale paraqiten shkurt, duke përcaktuar qartë thelbin e tyre. Këshilltarit mund t'i ndërpritet diskutimi, kur nuk i përmbahet rregullave të etikës, pasi është para lajmëruar.

Neni 33

Kohëzgjatja e diskutimeve dhe replika



REPUBLIKA E SHQIPËRISË KËSHILLI I QARKUT VLORE

Këshilli vendos si rregull një kohëzgjatje të caktuar për çdo diskutim në fillim të seancës, e cila duhet të respektohet nga këshilltarët që e marrin fjalën. Këshilltari, lajmërohet për përfundimin e diskutimit, një minutë para mbarimit të kohës së diskutimit. Në rast se diskutanti e tejkalon atë, ai paralajmërohet nga drejtuesi i seancës për ta përfunduar dhe nesë ai vazhdon, i hiqet e drejta e fjalës.

Diskutanti paralajmërohet nga drejtuesi i seancës edhe kur ai shmanget nga tema kryesore e diskutimit. Diskutantit i hiqet e drejta e fjalës, vetëm për atë problem të rendit të ditës, nëse kjo shkelje vazhdon. Kryetari dhe zv/kryetari i Këshillit, drejtuesit dhe këshilltarët e ngarkuar për të folur, në emër të grupeve, mund ta marrin fjalën për diskutim sa herë që e kërkojnë.

Këshilltari ka të drejtën e replikës, në rast se i përmendet emri në diskutimin e parafolesit. Replika është një qëndrim i paraqitur në mënyrë të shkurtër, për përmbajtjen e problemit që është në diskutim. Replika bëhet menjëherë, pas diskutimit dhe nuk mund të vazhdojë më shumë se 2 minuta.

Pas replikës, nuk ka kundër replikë.

Neni 34

Ndërprerja apo mbyllja e diskutimeve

Kryetari i këshillit, shpall mbylljen e diskutimeve, nëse lista emërore e diskutantëve ka përfunduar. Këshilltarët mund të heqin dorë nga diskutimi në çdo kohë, në rast se e çmojnë të arsyeshme. Mungesa në sallën e mbledhjeve, në çastin e radhës për diskutim, konsiderohet heqje dore nga diskutimi. Këshilltarët mund të kërkojnë mbylljen e diskutimeve me mirëkuptim. Këshilltari i listës emërore, nuk mund të pengohet të diskutojë, në rast se nuk shpreh mirëkuptimin për mbylljen e tyre. Nëse pranohet propozimi për ndërprerjen e diskutimeve, fjala i jepet drejtuesve të grupeve, të cilët dëshirojnë të diskutojnë. Propozimet si rregull, hidhen në votim sipas rradhës së depozitimit të tyre.

Neni 35

Votimi në mbledhjet e Këshillit

1. Votimi në mbledhjet e Këshillit, bëhet i hapur ose i fshehtë, sipas vendimit që merr Këshilli. Procesi i votimeve të akteve me karakter individual, si rregull kryhet me votim të fshehtë. Procedura e votimit të fshehtë, organizohet nga një komision i përbërë nga 3-5 këshilltarë të zgjedhur, me votim të hapur nga Këshilli.



REPUBLIKA E SHQIPËRISË KËSHILLI I QARKUT VLORE

2. Vendimet e këshillit të qarkut merren me shumicën e votave, në prani të më shumë se gjysmës së të gjithë anëtarëve, me përjashtim të rasteve të përcaktuara në shkronjat “a”, “b”, “ë”, “f”, “g”, “gj” e “ll”, të nenit 77, të ligjit nr. 139/2015 “Për Vetëqeverisjen Vendore”, që kërkojnë votat e më shumë se gjysmës së të gjithë anëtarëve të këshillit. Vendimet merren me jo më pak se tre të pestat e numrit të përgjithshëm të anëtarëve të këshillit për rastin e parashikuar në shkronjën “e”, të nenit 77, të ligjit nr. 139/2015 “Për Vetëqeverisjen Vendore”, i ndryshuar.

3. Në rastet e votimit për Kryetarin, Zëvendëskryetarin dhe Sekretarin e këshillit, kur nuk sigurohet shumica e kërkuar, votimi ribëhet midis dy kandidatëve, që në raundin e parë kanë fituar numrin më të madh të votave.

4. Vendimet e Këshillit shpallen brenda 10 ditëve nga data e marrjes së tyre dhe hyjnë në fuqi 10 ditë pas shpalljes. Vendimet me karakter individual hyjnë në fuqi në datën e njoftimit të tyre subjekteve që përfshihen në to.

Neni 36

Proces-verbali i mbledhjeve të Këshillit të Qarkut

Mbledhjet e këshillit fiksohen në procesverbalin e mbledhjes. Procesverbali mbahet nga një nëpunës i administratës. Në fund, pasi procesverbali kontrollohet firmoset nga Sekretari. Procesverbali i mbledhjes duhet të përmbajë:

- Vendin, datën dhe orën e fillimit të mbledhjes.
- Llojin e mbledhjes (e radhës, jashtë radhe, emergjente, vazhduese, e hapur, e mbyllur).
- Numrin e këshilltareve prezent.
- Emrat e këshilltareve që marrin fjalën dhe diskutimin e përmbledhur për secilin. (shënohen vetëm pyetjet dhe diskutimet e këshilltareve që u jepet fjala nga drejtuesi i mbledhjes).
- Vendimet e mara nga këshilli. Numrin e votave pro, kundër dhe abstenim për secilin vendim.
- Firmën e sekretarit,



REPUBLIKA E SHQIPËRISË
KËSHILLI I QARKUT VLORE
Neni 37

Vendosja e këshilltarëve dhe të ftuarve në sallën e mbledhjeve

Kryesia e Këshillit, në konsultim me drejtuesit e grupeve të këshilltarëve, përcaktojnë vendin e qëndrimit të këshilltarëve, titullarëve të Bashkisë dhe të ftuarve si vijon:

- Në pjesën balllore Kryetari, zv/Kryetari dhe Sekretari i Këshillit.
- Në vendet përballë me Kryetarin ulen me radhë Kryetarët e Bashkive së bashku me këshilltarët e tyre, të grupuar sipas bashkive respektive.
- Në fund të sallës, për aq vende sa ka salla, zënë vend të ftuarit dhe përfaqësuesit e medias elektronike dhe të shkruar.

KREU VII

MARRËDHËNIET E KËSHILLIT ME ADMINISTRATËN

Neni 38

Misioni i Administratës së Këshillit të Qarkut

1. Administrata e Qarkut është në vartësi të Kryetarit dhe Këshillit të Qarkut, si organi përfaqësues dhe ekzekutiv për ushtrimin efektiv të funksioneve, kompetencave dhe realizimin e detyrave që i ngarkon legjislacioni në fuqi.
2. Këshilli i Qarkut siguron lidhjet e drejtpërdrejta midis nivelit të dytë të qeverisjes vendore (Këshillit të Qarkut) dhe nivelit të parë (Bashkive) nën juridiksionin e tij, duke përfaqësuar në këtë mënyrë unitetin administrativo-territorial dhe interesat e përbashkëta të tyre.
3. Duke mbajtur parasysh misionin e Këshillit të Qarkut, administrata e tij punon për:
 - a) Garantimin dhe realizimin e kërkesave të Kartës Europiane të Autonomisë Lokale.
 - b) Realizimin e vendimeve që merren nga Kryesia dhe Këshilli i Qarkut. Në këtë kuadër punon për realizimin e ushtrimit të kompetencave të Këshillit dhe Kryesisë së tij nëpërmjet vendimeve, urdhërave dhe urdhëresave dhe nismave me interes publik vendor për çdo çështje që nuk u ndalohet me ligj ose që i takon një organi tjetër.



REPUBLIKA E SHQIPËRISË
KËSHILLI I QARKUT VLORE

c) Plotësimin sa më mirë të nevojave dhe kërkesave të komuniteteve përkatëse, për të arritur nivele sa më të larta shërbimesh që përmirësojnë standartet e shtetasve.

Neni 39

Marrëdhëniet Këshill -Administrat

1. Marrëdhëniet e Keshillit me administratën, mbahen dhe realizohen kryesisht nëpërmjet Kryetarit të këshillit të Qarkut, i cili merr masat e duhura për zbatimin e vendimeve të këshillit, si dhe relaton dhe informon këshillin dhe komisionet e tij, për ecurinë e aktivitetit të administratës.

2. Kryetari dhe nëpunësit e administratës janë të detyruar të informojnë këshillin, nëse u kërkohet, për të gjitha problemet e juridiksionit dhe ti vënë në dispozicion çdo lloj dokumenti për njohje, me përjashtim të atyre që parashikohen ndryshe me ligj. Kërkesa i bëhet Kryetarit të Këshillit të Qarkut, i cili autorizon personat/sectorët përkatës për plotësimin e saj.

KREU VIII

DISPOZITA PERFUNDIMTARE

Neni 40

Hyrja në fuqi

Kjo rregullore hyn në fuqi pas miratimit nga Këshilli i Qarkut Vlorë dhe afateve të përcaktuara në Ligjin 139/2015.

KRYETARI

Ervis MOCKA